



Karin Niederberger, la presidenta da la Federaziun svizra dals jodladers, ha chantà cun tschintg da ses sis uffants.



Giasts da Tarzsius Caviezel (dretg) èn stads Corina Casanova, chanceliera federala sco er Ruedi Lustenberger, president dal cussegl nazional.



Il Chor da jodladers Arosa durant sia produziun en la baselgia da Nossadunna.



Dus jodladers e la dirigenta da l'Aelplerchörli Vaz: Cécale Aaregger-Fischer, Erwin Danacher e Walter Küng (da san.).



Cusseglia federal Alain Berset ha tegni il pled da festa.



Dapertut sut tschiel avert è vegni jodlà e chantà.

FOTOS G. N. STGIER/A. METTLER

Allegraivel ed ina pasch

Festa federala da jodladers a Tavau

DA GION NUTEGN STGIER / ANR

■ **Buna atmosfera e quai tar vegl e giuven tar la 29. ediziun da la Festa federala da jodladers, sunatibas e bittabandieras. Ils 150 experts han gizzà bain las ureglias e constatà che las furmazions han jodlà sin in nivel fitg aut. Persvas han er las furmazions grischunas. La proxima festa svizra dals jodladers ha lieu en trais onns a Brig VS.** Cun organisar Tavau la festa federala da jodladers èsi vegni tar in novum en l'istorgia da la federaziun cun bunamain 20 000 commembers e commembras. Per l'emprima giada ha noss chantun retschet la famiglia dals jodladers da l'entira Svizra. Bunamain 1500 voluntaris han procurà ch'ils 10 000 activs ed ils radund 80 000 visitaders èn stads fitg bain, uschia che la festa resta a tuts en buna regardientscha. Dad ina festa grondiusa, dad ina occurrenza empernaivla e da muments nunemblidivels discurre Tarzsius Caviezel, il president dal comité d'organisaziun da la Festa federala dals jodladers 2014. Sa mussada pli che ventiraivla è ier saira er Karin Niederberger, la dunna grischuna ch'è dapi il 2009 a la testa da la Federaziun svizra dals jodladers. Ella lauda cunzunt la lavur exemplarica dals organisaturs, dentant er las bunas produziuns da las numerusas furmazions pli pitschnas e pli grondas. Ina giada dapli haja la festa testifigà che la tradiziun ed

ils usits vivian en tut las regions da noss pajais. «Jau sun satisfatga da quels quatter dis che han fatg bain er a l'olma», ha ditg la presidenta.

Trais giurors e giuroras

Jodlà e chantà è vegni en diesch lieux ed en tuts quels era durant las produziuns strusch da chattar be in sulet plaz. L'interess per las produziuns da las furmazions è stà immens grond e quai betg mo da la generaziun pli sin ils onns, mabain er da la generaziun vegnenta da jodlar. Gudagnà bainspert la simpatia dal public han cunzunt ils chors d'uffants che han davairas jodlà, chantà sco gronds e procurà per blera frestgezza e vita tar quella occurrenza naziunala. Ina festa allegraivla cun ina pasch sco tar paucas occurrenzas cun millis e millis participants e visitaders. Gizzà las ureglias en ils locals da silenzi han cunzunt ils giurors e las giuroras. En trais han els preni las furmazions sut la marella e taxà tenor ils suandants criteris: netezza da l'armonia, ritmica e dinamica e tunalità e pronunzia. Vitiers dat mintga giuror lura anc ina nota per l'impressiun generala. I dat ina classificaziun dad 1 fin 4 (fitg bun, bun, sufficient ed insufficient. Fin il mez d'avust retschaiva lura mintga furmaziun in rapport en scrit, per il qual segna il schefgiuror.

Tut ordador

Surstà ha lura segir fatg che solists, duets,

terzets e quartets sco er entiras furmazions han chantà tut ordador. Stui sa concentrar han jodladers e jodladras er betg sin dirigents cun esser quels en la furmaziun e dattan be a l'entschatta en il tun. En quella chaussa savessan noss buns chors rumantschs segir imprendier insatge dals chors da jodladers. In dals giurors ha lura er ditg che la gronda part dals jodladers e da las jodladras sappia betg leger notas, haja dentant ina ureglia fina. Jodlar è tuttina betg da cumparegliar cun chantar, damai che per jodlar vegn duvrada in'autra tecnica ed il pli chantà cun vusch da testa.

Notas maximalas per intgins chors grischuns

Dals 362 chors da jodladers ha pli che ina terza retschet il predicat fitg bun. Ferm represchentà a Tavau è cunzunt stà il chantun Berna e lura ils chantuns da la Svizra centrala. Success tar la 29. Festa federala da jodladers han dentant er gi intginas furmazions grischunas. Il Chor da jodladers «Sardonna» Flem ha retschet la nota maximala da 4, quai han ils giurors er dà als jodladers dal Chor «Carschenna» Seglias ed al Chor da jodladras «Steilalva» Seglias. Er la nota maximal ha retschet l'«Aelplerchörli Vaz» per sia chanzun «Maria la Regina dil tschiel», dal reminent l'unica chanzun rumantscha tar la festa, cun la quala il chor ha procurà per pel giaglina tar intgins en il public.



Buna luna, quai è stà il motto tar la gronda festa a Tavau.



Buna acustica cunzunt en las baselgias.



Cusseglia federal Ueli Maurer cun Karin Niederberger.



Schnuffar, quai tutga tar jodladers e jodladras.



Er furmaziuns da l'exteriur èn sa participadas a la festa a Tavau.




Il Chor d'uffants Randulina da Seglias.



Quai è il cas er tar ils bittabandieras.



Ina tradiziun en Svizra è er il sunar tibas.



Er quai manca oz betg tar ina festa tradiziunala.



Ina festa federala da jodladers senza furmaziuns appenzellesas fiss segir betg cumpletta.



Tar ils jodladers manca betg la generaziun giuvna.



Per ils proxims trais onns resta la bandiera da la federaziun dals jodladers a Tavau.



Jodladers e jodladras persequiteschan cun interess l'act da festa.